

Bolalarni tarbiyalash uchun oilaga qabul qilish to'g'risida

NAMUNAVIY BITIM

Bitim tuzilgan sana

Bitim raqami-son

Bitim tuzilgan hudud

Xalq ta'limi bo'limi nomidan nizom asosida faoliyat yurituvchi bo'lim mudiri Xalq ta'limi bo'limi nomidan nizom asosida faoliyat yurituvchi shaxsning F.I.O. (bundan buyon matnda Vasiylik va homiylik organi deb yuritiladi) bir tomondan, fuqaro(lar) Er-xotin yoki alohida fuqaroning F.I.O. Er-xotin yoki alohida fuqaroning yashash manzili Er-xotin yoki alohida fuqaroning pasport ma'lumotlari Oilaviy sharoitini qisqacha tavsifi (bundan buyon matnda Tutingan ota-onalar deb yuritiladi) ikkinchi tomondan, birgalikda Tomonlar deb yuritiladi, mazkur Bitimni quyidagilar haqida tuzdilar:

1-bob. Bitim predmetis

1. Vasiylik va homiylik organi ota-ona qaramog'idan mahrum bo'lgan voyaga yetmagan Ota-ona qaramog'idan mahrum bo'lgan voyaga yetmagan shaxsning tug'ilgan sanasida tug'ilgan Voyaga yetmagan shaxsning F.I.O.ning (bundan buyon matnda Tutingan bola deb yuritiladi) huquqlari va qonuniy manfaatlarini ta'minlagan holda Tutingan ota-onalarga tarbiyalash uchun topshirish majburiyatini, Tutingan ota-onalar esa mazkur Bitim shartlariga asosan Tutingan bolaning barcha huquqlarini ta'minlagan holda tarbiyalash uchun oilaga qabul qilib olish majburiyatini oladi.

2-bob. Umumiy shartlar

2. Tutingan bolani oilaga tarbiyaga olish (patronat) amaldagi nizom talablariga muvofiq amalga oshiriladi.

3. Tutingan ota-onalar tomonidan Tutingan bolani oilaga tarbiyaga olish ota-ona qaramog'idan mahrum bo'lgan bolalarni joylashtirish shakllaridan biri hisoblanadi.

3-bob. Tomonlarning huquqlari va majburiyatlari

4. Vasiylik va homiylik organi quyidagi huquqlarga ega:

a) mazkur Bitimning 16-bandida belgilangan asoslar mavjud bo'lganda uni muddatidan oldin bekor qilish;

b) Tutingan bolaning manfaatlari yo'lida istalgan vaqtda bolaning sog'lig'i, ta'lim-tarbiyasi va turmush sharoitini borib o'rganish;

v) Tutingan ota-onalardan o'z majburiyatlarining bajarilishi to'g'risida hamda Tutingan bola uchun sotib olingan kiyim-bosh va poyabzal bo'yicha hisobotlarni qabul qilish;

g) Tutingan ota-onalar o'z huquqlaridan g'arazgo'ylik yoki boshqa niyatlarda, Tutingan bolaga zarar keltirgan holda foydalansalar, shuningdek, uni nazoratsiz hamda zarur moddiy yordamsiz qoldirsalar, ularni qonunda belgilangan tartibda javobgarlikka tortish masalasini qo'zg'atish;

d) mazkur Bitim bo'yicha kelib chiqadigan nizolar yuzasidan sudda ishtirok etish.

5. Vasiylik va homiylik organining majburiyatlari:

a) bir yilda kamida ikki marta Tutingan bolaning turmush sharoitlarini va tarbiyalanishini borib o'rganish;

b) Tutingan ota-onalarni sog'lig'i to'g'risidagi ma'lumotlarni yangilash lozimligi haqida joriy yil tugashidan bir oy oldin ogohlantirish;

v) qonun hujjatlarida belgilangan tartibda Tutingan bolani har yili bir marta kiyim-bosh va poyabzal bilan ta'minlash va Tutingan ota-onalarga har oyda nafaqa to'lab borish choralari ko'rish;

g) mazkur Bitim tuzilayotganda Tutingan ota-onalarga oilaga tarbiyalash uchun berilgan bolalarni kiyim-bosh, poyabzal bilan ta'minlash hamda ularga belgilangan tartibda har oylik nafaqa to'lash tartiblarini tushuntirish.

6. Tutingan ota-onalar quyidagi huquqlarga ega:

a) mazkur Bitimning 15-bandi ikkinchi xatboshisida ko'rsatilgan hollarda uni muddatidan oldin bekor qilish yuzasidan Vasiylik va homiylik organiga murojaat qilish;

b) Tutingan bolaga nisbatan vasiy (homiy) huquqlariga ega bo'lish;

v) Tutingan bola nomidan hamda uning manfaatlarini ko'zlab qonun hujjatlari talablariga zid bo'lmagan barcha zarur bitimlarni tuzish;

g) Tutingan bolaga kiyim-bosh va poyabzal sotib olish uchun ajratilgan mablag'larni naqd pul shaklida yoki bank plastik kartasiga pul o'tkazish yo'li bilan olish;

d) Tutingan bolaning manfaatlari yo'lida sarflash uchun bazaviy hisoblash miqdorining uch baravari miqdorida har oylik nafaqa olish.

7. Tutingan ota-onalarning majburiyatlari:

a) Tutingan bolaga nisbatan vasiy (homi) majburiyatlarini bajarish;

b) qonuniy vakil sifatida Tutingan bolaning huquqlari, erkinliklari va qonuniy manfaatlarini himoya qilish, unga o'z huquqlarini amalga oshirishda ko'maklashish va shart-sharoitlar yaratib berish;

v) Tutingan bolani keyingi yil uchun zarur bo'lgan kiyim-bosh va poyabzal bilan ta'minlash maqsadida joriy yilning 15-dekabrigacha Vasiylik va homiylik organiga buyurtma taqdim etish;

g) o'z majburiyatlarining bajarilishi to'g'risida hamda Tutingan bola uchun sotib olingan kiyim-bosh va poyabzal bo'yicha hisobotlarni har yili 10-yanvargacha Vasiylik va homiylik organiga taqdim etish;

d) Tutingan bola uchun sotib olingan kiyim-bosh va poyabzal bo'yicha hisobot bilan birga mazkur mahsulotlarning sotib olinganligini tasdiqlovchi hujjatlarni (kassa cheki yoxud tovarga haq to'langanligini tasdiqlaydigan chekka tenglashtirilgan hujjat) taqdim etish;

ye) o'zining sog'lig'i to'g'risidagi ma'lumotlarni har yili 10-yanvargacha Vasiylik va homiylik organiga taqdim etish.

8. Tomonlar qonun hujjatlariga muvofiq boshqa huquqlar va majburiyatlarga ham ega bo'lishi mumkin.

4-bob. Tutingan bolani ta'minlash, tarbiyalash va ta'lim berish

9. Tutingan bolani ta'minlash, tarbiyalash va uning ta'lim olishi uchun zarur shart-sharoitlar yaratish Tutingan ota-onalar tomonidan amalga oshiriladi.

10. Tutingan bola tarbiyalanayotgan oiladagi bolalarning umumiy soni, o'z bolalari va Tutingan bolalar bilan birgalikda, qoida tariqasida, 8 nafardan oshmasligi kerak.

11. Oilaga tarbiyalash uchun berilgan (patronat) bolalar har yili bir marta kiyim-bosh, poyabzal bilan ta'minlanadi. Tutingan ota-onalarga Tutingan bolaning manfaatlari yo'lida sarflash uchun bazaviy hisoblash miqdorining uch baravari miqdorida har oylik nafaqa to'lanadi.

12. Tutingan ota-onalar Tutingan bolaning ta'minoti, unga ta'lim-tarbiya berish va uning sog'lig'ini saqlash bo'yicha tegishli davlat organlari va muassasalaridan huquqiy, metodik, diagnostika va maslahat yordami olishi mumkin.

13. Tutingan ota-onalar Tutingan bolaning ta'lim olishi uchun barcha zarur shart-sharoitlarni ta'minlaydi.

14. Tutingan ota-onalar Tutingan bolaning sog'lig'i, jismoniy, ruhiy, ma'naviy va axloqiy kamoloti haqida g'amxo'rlik qiladi.

5-bob. Bitimni bekor qilish asoslari va oqibatlari

15. Bitim quyidagi hollarda muddatidan oldin bekor qilinishi mumkin:

uzrli sabablar (kasalligi, oilaviy yoki mulkiy mavqeining o'zgarishi, Tutingan bola bilan o'zaro bir-birini tushunmaslik va boshqa sabablar) mavjud bo'lsa, Tutingan ota-ona tashabbusi bilan;

Vasiylik va homiylik organining tashabbusi bilan;

Tutingan bola ota-onasiga qaytarilganda;

Tutingan bola farzandlikka olinganda.

16. Mazkur Bitim quyidagi hollarda Vasiylik va homiylik organining tashabbusi bilan bekor qilinishi mumkin:

Tutingan ota-ona bundan keyin Tutingan ota-ona vazifasini bajarishiga to'sqinlik qiluvchi holatlar paydo bo'lsa;

Tutingan bolaning turmush sharoitlarini va tarbiyalanishini kuzatib borish jarayonida Tutingan ota-ona mazkur Bitim shartlariga rioya qilmayotganligi aniqlansa.

17. Mazkur Bitimni Tutingan ota-ona tashabbusi bilan bekor qilish ularning arizasi asosida uch kun ichida Vasiylik va homiylik organi rahbarining buyrug'i bilan rasmiylashtiriladi.

18. Mazkur Bitimning 15-bandi uchunchi – beshinchi xatboshilarida nazarda tutilgan hollarda Bitimni bekor qilish Tutingan ota-onalarni kamida bir hafta oldin yozma ravishda ogohlantirgan holda Vasiylik va homiylik organi rahbarining buyrug'i bilan rasmiylashtiriladi.

19. Mazkur Bitim bekor qilingan kundan boshlab Tutingan ota-ona Tutingan bolaga nisbatan huquqlari va majburiyatlarini yo'qotadi, Tutingan ota-ona orqali Tutingan bolani zarur kiyim-bosh va poyabzal bilan ta'minlash hamda uning manfaatlarini yo'lida sarflash uchun har oylik nafaqa to'lash to'xtatiladi. Bunda Tutingan bola uchun kiyim-bosh va poyabzal sotib olishga ajratilgan mablag'lar hisobidan xarid qilingan ashyolar Tutingan bolaning o'zida qoldiriladi.

20. Mazkur Bitim uning 15-bandi ikkinchi va uchinchi xatboshilarida nazarda tutilgan asoslarga ko'ra bekor qilingan hollarda Vasiylik va homiylik organi Tutingan bolaning qonuniy manfaatlarini himoya qilish hamda uni joylashtirish choralari ko'radi.

6-bob. Nizolarni hal qilish

21. Tutingan ota-ona Vasiylik va homiylik organining mazkur Bitimni tuzish, ijro etish, o'zgartirish va bekor qilish bo'yicha xatti-harakatlari (qarorlari) ustidan qonun hujjatlarida belgilangan tartibda yuqori turuvchi organga yoki sudga shikoyat qilishga haqli.

22. Vasiylik va homiylik organi Tutingan bolaning huquqlari, erkinliklari va qonuniy manfaatlarini himoya qilish masalalari yuzasidan qonun hujjatlarida belgilangan tartibda ariza bilan sudga murojaat qilishga haqli.

7-bob. Yakunlovchi qoidalar

23. Mazkur Bitim imzolangan kundan boshlab kuchga kiradi va Tutingan bola o'n sakkiz yoshga to'lguniga qadar amal qiladi.

24. Mazkur Bitimga qonun hujjatlariga o'zgartirish kiritilishi munosabati bilan va/yoki Tomonlarning kelishuviga muvofiq yozma shaklda o'zgartirish va qo'shimchalar kiritilishi mumkin. Bitimning qonun hujjatlari asosida belgilangan shartlari o'zgartirilishi mumkin emas.

25. Mazkur Bitimda ko'rsatilgan majburiyatlarni bajarmaganligi uchun Tomonlar qonun hujjatlariga muvofiq javobgar bo'ladi.

26. Mazkur Bitim ikki nusxada tuziladi, Vasiylik va homiylik organi hamda Tutingan ota-onalarda bir nusxadan saqlanadi.

8-bob. Tomonlarning yuridik manzillari va boshqa rekvizitlari

Tutingan ota-onalar

Yashash manzili: Tutingan ota-onaning yashash manzili

Pasport ma'lumotlari: Tutingan ota-onaning pasport
ma'lumotlari

Tutingan ota-onaning F.I.O.

Vasiylik va homiylik organi

Yuridik manzili: Vasiylik va homiylik
organining yuridik (joylashgan) manzili

Bank rekvizitlari: Vasiylik va homiylik
organining bank rekvizitlari

MFO: Bank raqami

STIR: STIR raqami

Vasiylik va homiylik organining rahbarining
F.I.O.

_____ (imzo)

_____ (imzo, muhr)